

钦定四库全书

史部七

松亭行纪

传记类四

杂录之属

提要

（臣）等谨案松亭行纪二卷国朝高士奇撰康熙辛酉二月癸酉圣祖仁皇帝恭奉太皇太后行幸温泉四月戊子驾出喜峰口士奇皆扈从因记其往来所经谓喜峰口为古松亭關故以名书然松亭關在喜峰口外八十里士奇合而一之未详考也所述滦河源流亦不明确至温泉有朱砂矾石硫黄三种圣祖御制几暇格物编中言之甚明士奇日侍禁闥典文翰之职不应不睹乃仍袭宋唐庚揣测之说殆不可解以其叙出山川风景足资考证而附载诗文亦皆可观故所著塞北小抄别存其目而此编则仍录之焉

乾隆四十六年三月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

●钦定四库全书

松亭行纪卷上

詹事府詹事高士奇 撰

康熙二十年三月二十日癸酉上奉太皇太后行幸温泉兼巡塞外平明法驾出东直门龙旂凤盖照耀川原午张黄幄尚食上躬亲侍膳太皇太后銮輿早晚出入上褰鞶骑导执礼恭谨道路观瞻咸颂圣孝隆古未有也驻蹕李家桥召入帐殿赐食夜深而退此后率以为常不尽纪

扈从恭纪二首

金麾玉轂动鸣銮宫扇开时夹道看淡荡柳风初换律茏葱花气不惊寒天伦有乐诚非易帝孝无涯礼更难此日宸瀛同颂祝呼嵩遥彻五云端

晴光蔼蔼下云衢喜见天家礼数殊六膳午调亲捧爵九旂晨动自经涂春深晚叶藏啼鸟风细轻轮转相乌藻卫前头时载笔拟将三辅继黄图

甲戌天气融和春风殆宕有晴光送遠目胜气入幽襟之意驻蹕三河县之兔东马房按通州境上有烟墩五曰石里燕郊东留村大黄庄高丽庄有子场三曰崇教鸣玉花园又有马房八自郑村坝以下俱在城北三四十里内乃前朝豢牧之所是夕侍于帐殿上曰明日当经盘山尔曾游否臣士奇对曰昔闻盘山乃畿辅名胜之地未曾登歷每切梦想上命侍卫一人同（臣）明晨往游兼谕（臣）士奇曰上盘中盘及李靖庵净业庵林木泉石尤为幽邃不可不到须穷一日之力从容眺望也（臣）拜命而出

乙亥晓行残月尚在马首同侍卫取径盘山时访山家经渔子山在平谷县东北十

里上有大塚旧传黄帝陵也其上有轩辕台下有轩辕庙唐陈子昂诗云北登蓟丘望求古轩辕台尚想广成子遗迹白云隈唐书子昂擢右拾遗会武攸宜讨契丹高置幕府表子昂参谋次渔阳攸宜轻易无将略子昂谏之蓟丘古渔阳地今读其览古诗前有小序云丁酉岁吾北征出自蓟门历观燕之旧都慨然仰叹忆昔乐生邹子羣贤之游盛矣因登蓟丘作七诗以志之此其一也城南五里逆流河之西有看花台相传金章宗玩花于此俱未及登策马行二十里许遥望峰崖层峭怪石磊落松栝千株扶疎高下悉托根石上丛条交荫时方春夏之交景物明媚山花半谢山鸟乱啼细路峻嶒马为屡却憩李靖庵庵后有峰高二里顶广四丈而平为李靖舞剑台云靖伐高丽过此唐李从简来游为题数字岭上一石如人着幞头坐而义腰土人目为石尉迟东十里为双峰寺过砂岭高二百余仞樵路宛转仅通人行灌莽荒榛未得安步循岩数十转心目渐高每度一折山情易向樵声自谷中起下视初不见人又二十里将抵上盘积石齿齿时闻人语在天上亦不敢仰视横岭悬度积石相乘直上可三百尺至盘顶云罩寺下视村落但见柔烟巔有舍利塔登览极遠志称影落塞外上有二龙潭下有潮井小坐憩息复寻少林寺寺傍红龙池凿石如龙以朱涂之甚不可解稍下为中盘寺一泉出峭壁草石间曲折作溪径石窦下为砂河戊午九月上游中盘寺爱其幽胜书户外一峰兼御制诗曰中盘遥见莲花峰日出山林气色重老衲题诗浑半偈翠輿临发又从容今镌于石亦兹山之荣遇也将游净业庵天已垂暮山光岚气蒙蒙湿衣下山行二十余里抵御营已二鼓矣志载盘山一名盘龙山在蓟州西北二十五里高二千仞周百余里势磅礴而盘桓因以为名昔人有云南距沧溟西尽洵水东放碣石自遠望之层峦迭翠峯嶺排空殆非虚语驻蹕蓟州所属郑家庄北得记一篇诗十首

### 赐游盘山记

康熙二十二年三月二十日銮輿东巡（臣）士奇以职在禁近得从属车越明日道经蓟野盘山翠色落人衣裾上念（臣）性耽林壑命往游焉凌晨策马由平谷登大岭绿仄径至李靖庵观舞剑台历青阳峪猿攀蚁附凌高降深二十余里过双峰寺至峰顶登黄龙祖师殿及舍利塔俯视卢龙古塞黄花白狼三千里外烽台濠塹了然目中真大观也憩云罩寺僧指净业上方白猿洞天门开诸胜人踪希絶怅然久之循山径游古中盘十余里中岩谷深隱积石趾错泉琤琮流石罅杂杂蔚蔚屡引清兴入正法院仰瞻御制游盘山诗雄浑高华增辉岩穴夫盘山屹立蓟门遠望之浑然一峰入山则奇峯疊出而九花双峰紫盖挂月自来为尤着盘桓起伏百有余里水石潺潺古松万株郁鬱苍苍是山之所以独擅其胜耶至其土人所言除夜圣灯为山中灵迹则（臣）未之信也（臣）少怀微尚分当隱约穷岫知遇以来待诏金马门者七年出入于紫宸者又五年早夜兢兢不敢自佚虽遥想灵山有爱嘉名无由欣对岂期豹尾之下遂有□游之人登临永日亦足以融养淳淑遂其所适之性耳虽遐心之可托实君恩之难忘执笔赋诗明其淡泊之志而已

## 盘山

昔读寰中记兹山劳梦想十年思一游尘事日鞅掌扈蹕过蓟门承恩恣观赏驱马踰崔嵬趣途渐深广萦回石径纡盘旋下复上山势兀嶙峋奔崖尽骀■〈骨莖〉缓策登危峰烦襟为一爽嚶嚶野鸟鸣汨汨山溪响暮春天气佳小憩在林莽松泉臣所须性志本疎朗茫茫属车尘时曳青藤杖从来箕颍心对此聊俯仰

## 李靖庵

夹天开小径崖■〈山上𠂔下〉隱诸峰黛色千崖石涛声万里松林深微见寺谷静远闻钟虚阁何年借聊清尘外踪

## 云罩寺

萝磴云中出花宫象外悬登临空大漠呼吸逼青天缔构神功健香灯寶地偏无生难可问小坐亦泠然

## 上盘絕顶

千仞耸危岫孤高数上盘扶筇看更险扪葛步仍难天外松风落崖邊草色寒尘襟一以涤独立感无端

## 登舍利塔

穿云寻雁塔扫石憩山椒晴影临邊塞天风下沉寥断阶苔半掩废碣字全销飒沓闻清籁铃声彻半霄

## 古中盘

丘壑兹多美流连空复情出山泉泱泱迁树鸟嚶嚶暝色催归骑樵歌引客程何如友麋鹿日日卧香蘅

## 正法禅院

一径入空林重岩秀色深暂来青嶂下聊畅白云心涧影留僊蹕山光动睿吟今朝遍幽赏归路日将沉

## 自双峰寺望上盘山

峯嶺双峰日已西空山寂寂鸟频啼依稀樵径无人迹只有花香送马蹄

松下禅扉报午钟溪桥路断白云封山僧指点遥岑寺犹隔巘岵四五峰

## 下盘山作

扑面红尘暗客衣年来蜡屐事全稀却从仗外看山色一路题诗歷翠微

丙子晓起入侍帐殿上问尔游盘山曾有诗否（臣）士奇对曰此地山川类多雄伟盘山细石长松境独幽秀真为名区畴昔梦寐思得一游不意扈从之时蒙恩赐（臣）登眺行幄中曾草记一篇诗数首所懷尚未能尽上曰俟至温泉錄出朕将览焉驻蹕遵化州所属稻地里

丁丑惠风初拂见山家桃花掩映篱落得诗一首驻蹕遵化州所属蔡家庄

见山家桃花

三月年光过渐稀尚余红蘂绽山扉多应野外无拘束留得春光缓缓归

戊寅扈蹕登景忠山山在迁安县界亭亭孤峙高数十丈凿石为磴折旋而上路径陡絕歷十余级一转辄有小祠可以坐憩其巔祀碧霞元君殿宇华洁香火甚盛上登陟从容早至絕巔（臣）愧无济胜具追随独后上题灵山秀色四字命侍卫掖（臣）而升午后微雨经三屯营郭郭坚固居人骈杂明总兵戚继光镇此路傍祠庙多祀之驻蹕迁安县所属滦河岸迁安本汉之令支县令音零支音祗即离支也东汉县废辽始于令支故城迁定州安喜县于此置安喜县金大定间始易今名桑钦水经曰濡水从塞外来东南过辽西令支县北酈道元注云濡水出御彝镇东南其水二源双川夹山西北流出合成一川又西北径御彝故城东镇北百四十里北流左道则连泉水注之又西北径渌水池南其水渊而不流又曲而东径故城北连结池沼谓之连泉浦又东北注难河右则汗水入焉水出东坞南西北流径沙野南名曰沙镇西北入难河濡难声相近遂语讹耳濡水又北径沙野西又北径箕安山东北流径林山北有池潭濡水又东南流径令支县故城东王莽之令氏亭也寿河水入焉水出令支县蓝山南后魏輿地风土记云蓝山者其色蓝翠重迭故名之也又一统志云滦河源自口北开平来径迁安县界至卢龙县南合滦河四十五里入滦州又南至乐亭县入于海又滦州志滦河在州城东三里发源于炭山乱泉潰涌合流东一百二十里至宣府又东北一百二十里至云州堡又东北三百六十里至桓州又自桓州过口北又自北而南入上都开平界东流七百里至栾阳营又一百六十里至迁安县又东南六十里至卢龙县西南合流于滦水又南四十里至滦州又南五十里至岳婆港夹乐亭县东为葫芦河西为淀流河合流六十里至马头营又二十里为綠洋沟入于海按滦水前皆无名禹贡夹右碣石入于河注云其水如辽濡溥易皆中高不与河通故必自北海然后能达河也汉地理志辽西郡肥如县注玄水东入濡水濡水南入海阳颜师古曰濡音乃官反辽史黄■〈彳 斧〉水北出卢龙山南流入于濡水而五音集韵则云濡水名一作湫在辽西肥如海阳又云濡奴官切盖音滦也方氏通雅亦曰濡水音乃官反今字书韵书失此音据此则今水有滦而无濡且湫滦字形相类岂古或通用而然耶驻蹕迁安县所属滦河岸

登景忠山絕顶应制

晓仗肃前驱逺峰忽迎面骋目迷烟萝游鞅豁葱蒨偃仄马难旋郁紆磴屡变五步十步中髣髴楼阁现直上丹梯悬横题金粉绚天气引翠华斯须若奔电峻陟慚微躬传呼复扶倩憑虚乃振衣心悸目犹眩俄惊巔崖间飞翥尽美善山光愜睿情万灵答隆眷扈从过三屯营

百雉岩岩古镇雄野祠多祀戚元戎荒屯黄犊耕春雨老树乌鸦噪晚风壁垒遥分榆塞北旌旗曾驻薊门东登坛将略今谁在寂寂花开乱草中

己卯河干设帐殿幙城上奉太皇太后驾临观览上率侍卫操小舟捕鱼以奉晨餐闻太皇太后慈颜喜悅赏赉甚厚随从舟中者皆得拜赐焉赋恭纪诗一首未刻上坐帐

殿中（臣）士奇侍上言滦河之水来自塞外论断形势如观指掌仰见宸衷经天纬地之学非（臣）浅陋所能窥测也晚复张宴岸侧宴内大臣及近侍诸臣天既薄暮隔河山色轻翠迎人波光荡漾青林送影（臣）士奇蒙赐紫金杯酒且谕（臣）曰今晚可不侍行殿必饮此杯也（臣）士奇感恩饮毕再赋恭纪诗一首仍驻蹕迁安县所属滦河岸

### 驻蹕滦河恭纪

崔嵬帐殿俯清流波影潏洄晓雾收隔岸苍岩开画障傍筵芳树隐丹骅银梭入饌初张罟翠釜烹鲜正泊舟为奉慈仁心豫悦漫云灞沪作春游

### 滦河侍宴恭纪

澄波浩浩漾斜晖手捧金螺坐翠微卷幔河山来帝座按图形势绕皇畿潜鳞竞向頽阳跃白鹭遥看破暝飞何幸叨逢瑶水宴身同藻荇沐光辉

庚辰驾回幸温泉驻蹕遵化州城东按遵化本汉右北平境唐于此置马监及铁冶因县焉今因陵寝重地改为州治志称遵化北有五里河源自片石谷口流坡谷间数里始合沽河又阳河出鲇鱼口黎河清水河出道沟峪口俱西南流会沽河水经注云沽水又南出峡岸有二城世谓之独固门以其藉险凭固易为依居两壁升耸疏通若门今独固门一名龙门在遵化州南十余里上合下开开处高六丈许水自悬崖倾泻而下触石成井奔荡之声轰然若雷石门峡在遵化西五十里有石将军在陝西高三丈水经注云灋水又东南径石门峡山高崭绝壁立洞开俗谓之石门口汉中平四年渔阳张纯反杀右北平太守刘政五年辽东太守杨弦与中郎将孟溢率公孙瓒讨纯战于石门大败之即此地也

辛巳太皇太后驾至温泉宫是日上謁孝陵随往仁孝皇后孝昭皇后陵驻蹕鲇鱼池行宫鲇鱼池旧有城堡以山顶石似鲇鱼故名汤泉在遵化西北四十里福泉山下宽平约半畝许有泉沸出明总兵戚继光甃石为池筑堂其上曰九新世祖章皇帝驾常临幸命建宫其旁丹碧而已不加华彩其池更以白玉石甃之深二丈方四寻凿石为龙吻喷甚怒其泉深碧可鉴气极温暖投钱池中翻若黄蝶百折乃至底四壁碑刻唐顺之汪道昆周天球诗最后一小石刻明武宗宫人王氏诗云绝塞穷冬冻异常小池何事暖如汤可怜一脉溶溶水不为人间洗冷肠又有寒泉去汤泉数武出于泥沙以剂泉之温明王衡汤泉记曰泉本寒沁有石根可一畝类焦釜覆之水受石性故沸所不及则否盖数武之内而水火共鼎亦一奇也宫又有寺建自贞观二年名福泉寺考博物志云凡水有石流黄其泉则温或云神人所暖主疗人疾唐子西云或说贵州地性酷烈故山谷多汤泉或说水出硫黄地中即温今临潼汤泉乃在正西而贵州余水未必皆热则地性之说固已失之以硫黄置水中水未必皆热则硫黄之论亦未为得窃意汤泉在天地间自为一类受性本然不必有待然后温也水经注云古右北平徐无城北庾水出焉西南流与灋水合又东南流与温泉水合按魏土地志云徐无城北有温汤宋王存九域志遵化县

福泉山水沸出温可燂鸡旁引为池方平如鉴而水经注言温泉水源出北山溪是今福泉疑即温源也南流百步伏入地中又折而东南径石门峡是即今石门口也是岁三月六日以两皇后山陵之役扈从诸臣蒙恩赐观汤泉同大学士（臣）明珠李蔚尚书（臣）梁清标吴正治魏象枢朱之弼王熙左都御史（臣）徐元文侍郎（臣）杨永宁李天馥项景襄杜臻翰林院学士（臣）张英侍讲学士（臣）张玉书詹事（臣）沈荃王扬昌蒋弘道通政使司通政（臣）王盛唐大理寺卿（臣）张云翼太常寺卿（臣）崔澄编修（臣）杜讷及（臣）士奇赋诗应制将勒石以垂不朽今附（臣）诗于左

三月六日驻蹕马兰谷【今呼多作峪】

赐观温泉应制【有序】

盖闻炎精所蕴气蒸山下之蒙阳德方升暖应谷中之律惟圣人出而地不爱宝斯灵泽通而天其降祥兹温泉者迺蓊苑之神皋当渔阳之胜地一峰特秀涌瑶波铜浦之奇二水分流具养德和神之用恭遇我皇上格天大孝钦奉我太皇太后应地弘慈御此仙源聿增景福爰选万几之暇时乘六龙以从云辇引鸾辂齐驱孝推一本野日共山花俱粲庆溢九垓斯帝室之鸿庥洵天伦之乐事然循源甃石不闻唐宗增饰之劳缘砌筑宫祇同陶后土茅之略避九成之暑鄙彼甘泉乘三月之和踵于上已（臣）获随龙驭式覩天心祇奉明纶再赓巴奏芜俚不剪难宣醴瑞于尧年祝愿何穷窃比蒲生夫舜日五言恭赋四律兼成

碧巘疏灵液虚明湛一弘入阶同草色响溜作松声朔野寒堪辟春山暖倍生真看涵育远万彙荷相成

文母调神处山阿道路通丹甍开殿迴白石甃池工表瑞称炎德承欢洽圣衷茅茨仍不剪朴略有唐风

半岭驻鸣驂仙源诏许探沼中浮淑气空外卷晴岚溅石流仍洁分杯味独并由来汤谷里不羡菊花潭

胜日宜登览川原夕照开涧花含宿雨陇麦拆轻雷【前一日初雷】地接园林近班随岳牧来太和蒸宇宙遥作五云堆

皇上奉太皇太后驻蹕温泉宫恭纪

离宫汤殿接清虚龙首澄泓暖溜潄碧草远分貔虎卫红云低护凤鸾舆天恩自许陪仙仗臣职何堪注起居岩下松萝烟霭合茏葱佳气万年余

壬午黎明上诣孝陵致祭（臣）士奇恭纪诗十六韵驻蹕鲇鱼池行宫

扈从谒孝陵恭纪十六韵

峻极开神域潜灵结奥区氤氲羣象集起伏众山趋秀岭看千迭平阳面一隅丰碑何截■〈山上泉下〉复道盛规模葱郁长松古潺湲曲涧纡春林花灿烂晓嶂树扶藎翹首瞻陵阙攀髯忆鼎湖肇基宏帝业开运握干符雨露寰瀛洽烽烟率土无万年绵玉

歷廿載闕珠襦柏殿丹云護苔階石馬趺遺衣同禹服廟器列商瑚穆穆皇情遠森森羽  
衛驅輕風生邃谷薄霧隱崇途拜謁微班忝齋誠大禮輸龍門回望處佳氣積蒼梧

癸未上至純親王停櫟之所祭奠微雨復霽駐蹕鮎魚池行宮

四月朔甲申上行圍茅鹿山射得二麋就山陽張幄炙鮮賜內大臣及近侍諸臣因  
問（臣）杭州飛來峰及泠泉亭景物士奇對曰唐白居易記云山樹為蓋岩石為屏云  
從棟生水與階平約略見之矣駐蹕鮎魚池行宮臣

乙酉上周視孝陵風水按孝陵本鳳台山在遵化州南四十里峰巒層秀頂如華蓋  
羣岫環拱眾水來歸規模宏整天造地設五峰山在東北崛起東曰快目南曰瑞雲西曰  
紅翠北曰虎岳中曰紫蓋綿聯起伏互相擁護真奇境也今封為昌瑞山載祀典駐蹕紅  
門外

丙戌駐蹕鮎魚池行宮（臣）錄盤山遊記及詩進呈御覽

丁亥隨上行圍過馬蘭谷馬蘭關舊設副將駐防關口其標下守備駐馬蘭谷守陵  
官員及上三旗甲士雜居于此方二月時兩皇后山陵巨典（臣）士奇同學士（臣）  
張英編修（臣）杜訥（臣）寄寓道院旬有餘日春花未放茲來已綠葉成陰矣駐  
蹕鮎魚池行宮再至馬蘭谷懷學士（臣）張英編修（臣）杜訥春深谷口上陵時坐  
卧閑房十日期細雨纔抽松葉暗驚雷催放杏花遲還家未久山光別處蹕重來草色滋  
今日經過懷旧侶遙知退食自彤墀

松亭行紀卷上

●欽定四庫全書

松亭行紀卷下

詹事府詹事高士奇 撰

戊子上辭太皇太后巡幸喜峰口外蒙古地方駐蹕三屯營城南

己丑上再登景忠山駐蹕三屯營城南

庚寅駕出喜峰口按喜峰口古松亭山也奇峰削下腰有洞高二丈余深倍之辽史  
為松亭關隸中京留守司開泰中置澤州俘蔚州民立寨居之王沂公曾行程錄亦云松  
亭嶺甚峻險今喜峰口東北有小城曰徐太傅城為明徐中山達所筑歲久彌堅遠望如  
碧玉懸崖斗聳人迹希邈昔有人久戍不歸其父來尋適遇此山下相抱大笑喜極而絕  
遂塋于是俗因謂之喜峰口后訛為喜峰元許有壬圭塘集載之頗詳兼有詩述其事云  
兒寒解衣重撫摩兒飢推食孰忍訶長成與國遠負戈一去不返當如何去時云出東北  
鄙直出榆關度辽水白頭郎罷與影俱豈憚山川千萬里天教此地適相逢父曰从天墜  
吾子笑疲樂極俱殞身誰謂情鍾遽如此官家開邊方未已同生又別寧同死山云漠漠  
風颼颼山頭双豕知几秋當時不忍一朝喜今日翻成千載愁猶勝貞女化為石終古孤  
身双不得清江寒影日悠悠行人一去無消息駐蹕喜峰口外白台夜聞虎嘯响振林谷  
扈從出喜峰口

清蹕出雄關鳴笳歷荒徼夾嶂真天開壁立盡奇峭往時設重戍藉此為險要戰壘  
虛風生孤城斜日照年年荷戈人未得失征調自從被至德遠近奉明詔遂使邊隅民不  
用驚烽燧喜隨萬乘來快哉肆登眺

### 晚宿白台

塞行未十里塞景已殊異入目多荆榛亂峰含紫翠翹首睇長城萬載嚴邊備連幕  
宿山陽迢遙橫晚吹虎嘯岩谷鳴颯颯風隨至幕火散繁星周廬環七萃來朝屬車塵應  
抗凌云志

辛卯曉發白台自口內看塞上諸山與長城共相起伏坡坨平衍步履可注銷口則  
迭嶂層崖山勢陡峻密筱叢枝攀援無路四望長城雉堞干天如長蛇天矯自西而東絕  
巘平連飛鳥難越天之所以限中外也過九狐嶺又曰九宮嶺一徑紆折高下相乘細澗  
橫流淺深競渡中多楓樹及楂梨榆柳余花新葉紛映馬前左右高山蹲岩怪石景隨徑  
轉為態多端黃土崖一峰矗峙峭壁如削石色蒼黃高百余仞其間多生松栝有一岩竇  
在半山巉絕處兩崖中斷支一木橋危險無異石梁遙望竇中窻牖畢具石佛橫卧昔傳  
異僧居焉山有大小石塔七十座土人名為打藍蘇妹譯云七十座塔也過此二十余里  
境忽寬平有土城遺址曰寬城相傳明宣宗駐蹕于此一面倚山一面尚余土墉通南北  
二門甃石殘缺蔓草荒蕪中微見井闌柱础土人名為博洛忽洞者是也按明宣宗實錄  
宣德三年八月丁未車駕發京師渡潞河九月庚戌入薊州至石門驛喜峰口守將遣人  
馳奏烏梁海萬眾侵邊已入大寧經會州將及寬河宣宗覽曰是天遣來此投死耳遂駐  
蹕石門之東召問諸將咸請擊之亦有請益征兵者宣宗曰此出喜峰口路狹且險單騎  
可行若候諸將并進慮緩事機遂決策親征簡精銳騎士三千人人二騎自持十日糧命  
文武扈從者悉留遵化惟太子少傅楊榮從乙卯出喜峰口軍士銜枚斂甲韜戈而馳昧  
爽至寬河距敵營二十里分鐵騎為兩翼夾擊之宣宗親射其前鋒殪三人敵望見黃龍  
旗悉下馬羅拜請降皆生縛之獲生口駝馬牛羊輜重丙辰駐蹕寬河分命諸將搜山明  
日移營前進至冷嶺又明日駐會州大飭將士親制詩歌慰勞之又數日班師駐鐵將軍  
店及擺山站按此則宣宗當日駐蹕寬河纔兩日不知此城何時所建也過寬城數里山  
更奇峭河流漸廣有石硯黑色周十數丈交枕河畔夾岸生芳枳木連雜以草卉山水之  
趣聊以騁懷上尚食水次諭（臣）士奇曰前朝此土悉為枕戈卧甲征戰之所自我太  
祖太宗威德遠敷數十年來蒙古四十八部盡歸王化今朕巡幸所經安得不念祖功宗  
德（臣）士奇對曰仰見聖心不忘創業艱難誠社稷蒼生之福也駐蹕大石硯北是日  
御制過黃土崖大石硯詩二首（臣）士奇捧讀畢恭和進呈歸幕后又得雜詩數首

### 御制巡幸出喜峰口過黃土崖

紫塞雙崖出丹梯百尺懸草香遮細路樹老卧晴烟地為時巡到山當隘口偏何年  
留石室駐馬望層巔

### 御制大石硯

遠近峰迴合潺湲澗淺深一硯橫大石萬騎出層林蒙密岩花發綿蠻谷鳥吟龍堆  
塵不到憑眺足娛心

奉和御制過黃土崖原韻

黃崖天外削碧樹半空懸徑絕遲歸鳥山空聚午烟北來千嶂密西去一關偏萬乘  
披襟處風回百尺巔

奉和御制遇大石硯原韻

山色看多變行程覺漸深花光浮斷岸水氣散喬林怪石干雲染攢松萬籟吟龍鑣  
成小憩洒墨寄遙心

長城

嬴秦曾設險絕徼營堅城蜿蜒亘萬里形勢何崢嶸塹山筑雉堞絕壁同雲橫人工  
既已盡天險巍然成控制接陝右拱抱還燕京疇昔邊事嚴老幼苦長征秋聲警哨動夜  
火邊烽明盛朝久息戰四境歌承平石樓鳥雀栖亭障荊棘生但看飲馬窟日落寒潭清  
過九狐嶺

六龍乘曉發萬騎陟重岡灌木翳青天亂石縈羊腸縱橫澗水流隱約山花香山花  
非一狀紅紫含芬芳更有青楓樹芳忘凝衣裳仰面觀奇峰怪石紛低昂時當四月初猶  
覺山風涼曠然心眼豁不似披遐荒兼旬實壯游塵慮應相看

黃土岩

何年凿山骨屹立疑千尋徙倚不可即駐馬空沉吟藤梢與葛刺蒙密何陰森懸崖  
支一木微徑通■〈山上欹下〉嵌岩扉有遺迹邈矣烟霞深杳靄青松際白雲迷至今  
寬城是明宣宗駐蹕處

山川盡逼仄草樹更蒙茸行行忽開闢疑有城郭踪西南倚峭壁土阜余高墉傳是  
翠華駐彷彿門兩重草中見礪礪石罅山花秾當年辟疆土此地陳軍容裹糧驅戍卒打  
火起邊烽今逢聖人出萬里皆提封

明宣宗駐蹕寬城北五里水次

省方入遠疆駐蹕蒼崖里崖下俯長河波瀾最清駛娟娟三兩峰掩映雲霞紫微風  
响礪松殘陽下流水幽賞平生懷對此翻然喜卷幔息銀燭愛看山月起

壬辰山崖盤復前望似無去徑峰回路轉乃更豁通出達希喀布齊爾口為蒙古界  
山情頓易喀爾沁部落長率其所属跪迎道左上慰勞之駐蹕達希喀布齊爾口北

將出達希喀布齊爾口道中作

眾山向背殊峰峰自回互石上漾清泉山根叢茂樹咫尺誤行踪往來遵細路灣環  
數十轉潺湲八九渡林花雜春夏風景變朝暮勝攬意不窮塞行有深趣

車駕出達希喀布齊爾口喀爾沁廓爾沁諸部落率其所属伏迎道左

直北幽厓早向誠不須更筑受降城職方記載梯航路王會傳呼拜舞聲紅綻邊花  
迎雉扇青搖岩樹轉龍旌太平游幸非征伐豈是元封自勒兵

癸巳喀尔沁部落以骑兵三千前驱列围分左右翼持两白旗连冈截野驰二三十里或三四十里遇有平旷之地围乃渐合高山峻岭望而咋■〈山上号下〉类皆土壤策马可登茂林青榛参天匝地猎骑纷驰穿林带谷司马相如所云雷动焱至星流霆击庶几似之驻蹕察汉城地方

### 从猎

苍山万迭雨初晴从猎朝看塞上清月兔射来夸技絶星狼追得斗身轻班聯翡翠翎中坐队入鹅黄褶里行十二羽林皆健将只容欸段一书生【臣班在亲随侍卫之列】

甲午廓尔沁国及班仑诸部落皆至朝于帐殿是日上于围中射一虎应弦而毙蒙古诸部落覩上弧矢之威无不颂服驻蹕乌兰布尔哈苏

乙未上行围山中水泉清泠纖草铺茵杂卉柔荑布满岩谷有名长十入者紫色蓓蕾元果啰罗讷延塞上曲云双鬟小女玉娟娟自卷毡帘出帐前忽见一枝长十入折来簪在帽檐邊即此花也五代胡峤北行纪所载旱金莲大如掌金色烁人青囊如中国金橙而色类蓝二种皆有之又有离娄开花如鸡子殼中含双蕊色若莲瓣娇艳可爱一名■〈廿间〉茹芍药红白者最多晓风微逗芳香袭人赋塞外见芍药诗二首驻蹕西尔哈河

### 塞外见芍药花

絶徼寒多春较迟马头惊见两三枝虽然不及邗沟种也自秣华斗一时

浅浅轻肤映玉肤任他开落委靡芜焉支山下多颜色得似新花袅娜无

丙申上尚食山阳赐（臣）士奇炙鹿茸一双少顷谕（臣）士奇曰见尔颇能乘马何不习射（臣）士奇对曰（臣）幼时亦曾习射但力微不能开劲弓今久废矣上曰射乃六艺之一读书人亦当知之驻蹕拜查月色如昼夜深立幕外望塞上山川巉岩络绎围拱中原山空夜半万籁闐寂惟闻御营行漏时传崖谷答响邻幕诸人俱已熟睡独立沈吟赋诗二首

### 月夜望塞外山川

行漏宵严夜月明高山络绎影纵横清添鳳拍吹笳壮光动龙堆牧马惊紫塞苍苍绵大漠黄榆歷歷暗长城天教此地分中外秦汉徒多用武名

### 塞下感懷

浅草坡前罢猎归高林斜月影微微金波不改秦时色玉晕仍涵汉殿辉闺信有谁传锦字庭趋还独念斑衣休贪定遠功名看客路年年已息机

丁酉沙际草青细渠决决塞外四月早暮犹寒惟亭午日色暄暖有如春暮方当围场未合下马趺坐天光云影别具野趣是日围中上又亲射一虎驻蹕和尔和

戊戌所经时见蒙古居人在山隩向阳处富者支毳幕内设床幔以妆锦为之亦有箱奁诸具贫者幕上惟覆以苇花布为幔客至则男妇欣喜炊大热奶酪奉客有出捫酒

梨麪来劝者幕外多树乱木为栅以圈牛马虞有虎害大约塞外山川遠者数十里近者十余里互相绵亘两山断处谓之一沟每沟所住蒙古不过三两家恐碍放牧也土极肥沃居者懒于耕耨仅种稗稷不设沟塍播种之后聽其自生以羊为常餐比亦知养鸡豚矣驻蹕巴尔汉汤泉较遵化之泉更热秦少游所谓蔽于丛薄堙于土涂抱清懷洁歷千百年莫或稍试于用者上为留憩月上乃归

### 晚至汤泉

夕照下西岭平楚生荒烟千旗散晚猎万马奔前川忽看碧草际一水流溅溅深涧转澄彻暖气如沸煎少坐濯尘缨云是古汤泉遠聽铙吹发帘幕灯光悬四望尽暝色圆月明山巔

己亥平明巡视者报夜来虎至营中伤一骊马拖至前山林木下食未半其虎尚在山间上率侍卫往射殪之其大如牯牛诸蒙古云此虎久踞道侧伤人甚众今除行旅之害共相色喜为赋射虎行是日山间鹿麋极多雉方卵于草间得一子献者賚银五分所进数千枚驻蹕乌郎冈

### 射虎行

輿图荡荡界蒙古玉辇时巡歷兹土回冈巨壑丛棘多阴森林木不知午千骑万乘排空来夜张行殿山之坞月上忽闻羣马惊传道山前出猛虎晓看一马果摧折血肉淋漓去两股龙鑣飞控陟层崖禁林卫士挟弓弩拶岩剔藪无几时一箭横胸洞肺腑遠人手额复战栗踧言此虎为患苦道傍白日每捕人伤残行旅莫可数幸兹恶劣得剪除当代君王果神武从来射虎多耳闻何似臣今得目覩因叹蠢顽本不灵贪饕无厌乃自取不然长林茂草间餐眠何畏施网罟杀人安人王者心即此推之泽自普

庚子入山峰围崖合中更坦朗长松千余株歷落偃仰各具异态数百年物也午后阴雨晚复明霁山山夕照树树残霞志为塞上矣驻蹕穆雷布尔扯儿

辛丑驻蹕洮西汉台山阜平连蔓草无际土人云此去二百里则皆坡坨莎草渐无林木为产骆驼之所壬寅山谷之间多毡庐木栅喀尔沁部落所聚于此不遠驻蹕塔布恩海落思泰地方上赐内酒一樽諭曰尔总不能饮可散同行者拜命而出

### 癸卯驻蹕俄伦蒿齐特此日方进新樱桃

甲辰驻蹕察汉城南或云即会州城也连日行围所歷类皆荒山丛林人迹罕至之处

### 扈从塞外杂记

古人邊塞吟但道沙漠苦谁知遠徼外峰崕更参伍地腴苜蓿肥山幽松树古若令勤耕织其益岂小补苇幕山之阳终岁牧牛羖近稍敦礼义渐渐识规矩伛偻谒道隅趋蹕申拜舞欣看古瓿脱近受王化抚

空山狐兔羣终歲少人迹丛条蔽遠冈墮叶堆荒泽首夏犹苦寒邊风日将夕夜雨声潇潇灯光暗油碧云黑峰峦沉但见炊烟白

乔松千余株枝枝尽奇矫远望青岑边似在白云表雨过林壑清天空初日晓羽骑来骖驔霓旌更飘缈迤邐入山谷细路历深窅终日临高峰嵌崎复盘遶回首顾榆关万山青不了方知地轴雄结构非藐小

人生宇宙间志愿当何如不行万里路即读万卷书早岁慕五岳中年困穷居耳目苦未广怀抱惭空虚鸣镳随禹载揽辔观皇舆出境虽不遥问历皆异墟朝朝扈蹕行非是劳征车诗成傲往彦徒见征伐余

乙巳赐宴喀尔沁廓尔沁诸部落于达希喀布齐尔口上坐黄幄中皇长子及温郡王侍诸部落率其所属列坐于幄之左内大臣列坐于幄之右蒙古上下数千人人赐酒一金叵罗乳茶一瘦碗顷刻而遍宴毕赐诸部落蟒袍帽带鞢袜弓矢佩刀鞍辔缎帛银布有差内大臣噶布喇引一蒙古至幄前上召（臣）士奇数其创痕头面项背胷臂凡二十四处上曰此蒙古梅勒章京也近年调征处州阵前所创如许得以不死（臣）士奇奏曰皇上推心置腹以诚信待人故使远人皆能尽力疆场仰见恩泽之入人深也驻蹕达希喀布齐尔口北薄暮雨是日御制塞上宴诸藩诗敬录于左龙沙张宴塞云收帐外连营散酒筹万里车书皆属国一时剑佩列通侯天高大漠围青嶂日午微风动彩旂声教无私疆域远省方随处示怀柔（臣）士奇赋恭纪诗二首

#### 宴喀尔沁诸部落恭纪

黄幄高张羽卫陈遐方述职尽称臣金螺酒醴颁三爵寶碗茶膏遍一巡问俗远同虞出狩要盟欲笑汉和亲长城有险休重设至治从来守四邻

#### 看赐喀尔沁及诸部落恭纪

帝泽从容被八埏精鏐文织散穷边应羞使者通西域何用将军款右贤锦绣平添林峤色云霞四映塞垣天贾生五饵终迂论王道平平自可传

丙午上回銮入达希喀布齐尔口诸蒙古跪送道左行未十里山气缕缕含烟忽复流云四野天气曛黑大雨如注青林翠壁顷刻莫辨时而长虹拔地直与残阳相射轻雷断雨隐隐遥天驻蹕冰窖地方毡幄孤檠添我旅梦也

#### 过大石矶行雨中

流云浮晶晶山川杂烟雾出没多奇峰穹窿各吞吐驱马上悬崖崖倾马惊顾百里尽蒙密杳霭失前路古道几登陟乱流绕深树活活雨脚低隐隐雷声布涧外起长虹转觉天垂暮

丁未晓霁过黄土崖宽城诸处时已清和林木葱茂花香夹路紫白万状山多藿草开满崑岫采以为蔬即黄花菜也侍卫诸臣竞取以进入喜峰口始见瓦屋不禁心喜驻蹕滦阳城南

#### 将入喜峰口新霁

云际露山顶青林来日光晓徙六龙行高下逾重冈岩花落未残磴道余芬芳鸟声辨闕树人语如故乡铙歌清吹发远风旌旆扬鑿凿万仞余郁弗临大荒歷兹战斗地壮

士颜慨慷愿施造化功处处知耕桑

戊申经三屯营遵化州见道傍野寺榴花盛开感节物之变赋诗纪之上至温泉问太皇太后安驻蹕鲇鱼池行宫是日都门遣仆至得家信

入喜峰口后见路傍野寺榴花

去时邊草色初綠归路山榴藥已红古寺一枝偏照眼短衣匹马夕阳中

过遵化

突兀孤城倚重边堠台瞭馆尚依然将军幕冷埋戈甲开府堂空咽管弦耕凿已安全盛目挽输犹说乱离年遥瞻王气陵园近短麦青青遍野田

己酉驻蹕鲇鱼池行宫

庚戌驻蹕鲇鱼池行宫辛亥致祭孝陵驻蹕鲇鱼池行宫

壬子上奉太皇太后回銮望黄花山山势雄陡戍楼尽废明蒋一揆记云黄花镇有礼鼠色如鼯而毛浅冬时聚榛实为粮于穴中作岐穴贮之若仓困然多至三斗其榛实皆美好价倍于人所收者山氓多掘取之鼠失榛实牝牡皆竿脰树枝悬死若缢镇将闵之为禁甚厉然不能止驻蹕蓟州所属七里峰村东

皇上自温泉宫奉太皇太后回銮恭纪

芝蓋华旗曙色分花光山翠早迎熏尘销驿路初经雨柳暗官城半拂云尊养灵泉来祓濯寬租穷户重耕耘【诏所过之地免今年租】车音嘒嘒还鑣处鸾鹤纷飞下紫雯

黄花山

青苍百仞截云孤守险曾经却万夫古戍有楼惟旧垒防秋立寨只长榆兵销治世耰锄满路近空村鸡犬无一自八荒归雨露邊陲万里尽亨衢

五月朔癸丑

上命再续盘山之游道由蓟州问赵韩王故里不可得自此入山路极峻巖青林文筱竒石流泉与野花蛺蝶相映带所歷崕谷皆寂不闻人声净业庵在林峦最深处高阁瞰空幽邃可爱老僧十余人亦皆朴野汲泉瀹茗少为流憩复由古中盘而归驻蹕三河县东

过蓟州是赵韩王普故里

尘埃千载遇事业建隆尊遠略销诸镇深谋定太原机权争词组岸谷构微冤忝窃叨王爵何曾读鲁论半生懷旧恶垂老固新恩故里荒丘着虚名宋史存春流仍润润野烧尚村村向晓过城北徒闻鸟雀喧

再游盘山

暮春陟崇阿山灵谢客久回车重逡巡倏复中夏首取径异畴昔髣髴寻谷口绪风从南来泉声清且浏繁英过眼新密荫解襟受感此节物迁行行歷冈阜石人坐藤萝招我若旧友四山空翠来盘礴豁两肘对之万虑澄身世渺何有侧足天地间烟云结榻牖

顾兹尘外游屡许鞅掌后飞跃任羽鳞睠焉抚高厚

净业庵

往者度遥岑忽焉日将夕耽幽殊未穷兹来理轻策杰阁霄际穿踈棂树杪隔隐翳  
势若藏攀跻境乃辟老僧畏送迎相顾始肃客能炊松火红亦煮涧泉白揽衣席空阶闲  
云生咫尺下岭望前旌迢迢踰紫陌

甲寅始换新穀驻蹕通州所属崇阁庄南晚得微雨

乙卯入东直门都城人家户悬赤灵符菖蒲艾叶俨是重午行役之人初不知也上  
奉太皇太后回宫

扈从回京

艾白蒲香五月天归时清梦拟游仙新诗句句关山壮何似前人羽猎篇松

亭行纪卷下